

四庫全書

史部

欽定四庫全書

閩中理學淵源考卷二十四

廣平府知府李清馥撰

朱子福寧門人并交友

按宋寧宗時黨禁方嚴朱子曾避跡是邦相其山川
靈異謂五十年後必有人出能盡讀天下書攷其時
從學者黃尚質幹楊志仁復林正甫湜此外尚多其
選及至末造義豐師氏主盟教席英髦不衰至元代

石堂陳氏伯循韓氏輔翼友教者數十年朱門之學
賴以不墜公之言於是信而有徵矣

朝散郎楊通老先生楫

楊楫字通老長溪人剛介不苟合與楊方楊簡俱朱門
高弟號三楊舉淳熙五年進士調莆田尉閩帥程叔達
移縣括逃田楫歷疏不便帥大怒楫徐對無所屈罷去
漕使林沂曰尉敢格帥大是奇事遂薦之累官司農寺
簿奏劄論進君子退小人勿徇左右之請以重中書之

權飭執政之臣可否相濟以任憂時之責獎廉隅之操
絕奔競之風除國子博士轉少卿臺臣或干以私答曰
臺省紀綱學者規矩當各守職無相侵越尋出知安慶
移湖南提刑江西運判終朝散郎嘉定六年卒著有奏
議及悅堂文集人稱為悅堂先生

閩書

考亭淵源錄

龍圖林正甫先生湜

林湜字正甫福寧長溪人紹興三十年進士調富陽尉
改知晉江判南劍州太守議官自賣酒湜力爭不可守

自為奏朝廷視無通判署疑之守奏遂格除監察御史
疏言陛下托股肱於宰執而所授皆小人寄耳目於臺
諫而彈擊皆君子治亂之大無過於是為殿試詳定官
某士對策剴切湜擬第一朝廷不用及侍御史劉光祖
下遷湜曰可以行矣再論靜江知府錢之望出為江西
轉運判官歷太府司農卿充孝宗遺留使金國通名金
以服賜湜湜揮擲之曰宋正統相承服視其品今易左
衽有死而已金不能屈復命光宗迎謂曰卿守禮甚堅

國體不失韓侂胄讐逐正士呂祖儉上書爭之貶嶺外
湜見余丞相曰呂子約南行執奏收回大臣責也力請
外除湖北轉運副使進直龍圖閣致仕湜性泊淡散朗
雖為政精敏遇事立斷而平居但教諸生誦說若不涉
世故者於善惡賢不肖明白而又護惜善類世所謂善
人君子常欲以一身同其榮悴去留故議論多激發見
忌於人是以齟齬廢斥而終不悔朱文公被斥士皆遠
嫌湜獨執弟子禮不變未沒前數月猶馳書問疑義著

樂隱集

按先生與文公平昔相嚮慕在師友之間疑是文公晚歲因楊通老致書而稟學者觀朱子答書云仰慕高風固非一日又稱其所學之深所守之正其所蘊蓄蓋已施之朝廷而見於議論之實其推

許可想已
淵源錄 閱書 考亭

直學士黃尚質先生幹

黃幹字尚質福寧人師朱子著述甚富餘干饒魯寧德李鑑皆師之所著有梅鑑語五經講義四書紀聞官至直學士

教授高國楹先生松

高松字國楹福寧人少游陳止齋之門又從朱子受學
登紹熙元年進士授台州教授啓迪有方一時州縉紳
皆出其門故例撰講章據案抗聲讀名曰講書松曰是
何所發明耶令更進迭問疑難交發滿意而退士人懽
服葉水心銘其墓

縣丞進士陳敏仲先生駿

子成父

陳駿字敏仲寧德人乾道進士為大冶丞遊朱子之門

為鄭師孟諸賢所宗號仁齋先生所著有論語孟子筆義又著毛詩筆義未就而卒子成父字美玉能守家學以立誠為本行已皆有法度辛棄疾知福州聞其名羅致賓席著近思錄律歷志解默齋集等書

龔曇伯先生刻

龔剡字曇伯寧德人曾祖允昌有學行嘗著家訓以反身修德為主祖必俞以行稱剡早從未子學不務口耳晚與同門楊信齋復論辨理氣先後之說甚有造詣有

詩文集數卷自號南峰居士

閩書

通志

鄭齊卿先生師孟

鄭師孟字齊卿福安人安貧力學六經註疏手自抄錄

受業文公之門黃直卿妻以女嘗著洪範講義以發明

文公皇極辨之蘊號存齋先生

通志
源錄

閩書

考亭淵

張潛夫先生泳

張泳字潛夫福安人蚤志濂洛之學家居教授多有顯
達慶元中偽學禁興大比試天下之言性論有司讀其

文驚異為壓場策問偽學泳抵排異端力主朱子之傳
學者稱墨莊先生著有一得錄禮記遺說左氏纂類會
粹古今事類二百卷集關洛諸儒語為傳心直指十卷

四愚齋類藁

道南源委 閩書

孫和卿先生調

孫調字和卿福寧人其學得朱子之傳以排擯佛老推
明聖經為本著有策府五十卷易詩書解中庸發題共
五十卷浩齋稿三卷學者稱龍坡先生

林守一先生守道

林守道字守一又字艾隱福建福寧人自孩提已嶷然
不羣恥與羣兒弄十歲失怙恃卓有大志刻苦讀書蚤
工詩賦年十五即嘆曰破碎非吾學也改學經又嘆曰
破碎猶吾前日詩賦也改從晦菴先生遊願聞大道之
要裹糧束書至中途聞晦庵訃而返慨然閉戶力學精
思實踐如及考亭之門焉性剛直每面折人過鄉閭多
畏憚不敢為非吟筆天成輒出人意表家貧僅終伏臘

而賦佃租特寬不擇美惡燥濕輒槩入鄉父兄以此德之桂發捧鄉書至謹以為積德之報而不知此於先生未足窺毫末也先生遺藁甚多散落不存晚猶嗜易積十年精通卦義至晚尚吟誦不輟子男三人宗旦如坦皆有文名桂發受業晦菴之門人信齋楊公復以繼先志登淳祐丁未進士第

黃氏東發撰墓誌略

閩中理學淵源考卷二十四

欽定四庫全書

閩中理學淵源考卷二十五

廣平府知府李清馥撰

建陽蔡氏家世學派

考劍建間斯時儒術昌明風流世篤人材多萃乎一家一門閩中武夷胡氏而後蔡氏以九儒著蓋得父師之教根源遠矣

國錄蔡守信先生諒

蔡諒字守信家建陽其先弋陽人唐昭宗時八世祖爐從王潮入閩為建陽長官卜居麻沙鎮累傳至伯禧宋真宗時以神童授春官伴讀賜詩褒美弟伯充生諒紹聖四年繇鄉貢入太學除大名司訓擢太學錄崇寧間表勸徽宗以剛仁勤儉又語蔡京曰清慎正直宰臣之度司馬光呂公著何等人品而目為奸邪且鑄之石也京大怒即棄官歸寄傲雲谷西山間自號首陽居士子發孫元定曾孫淵沆沆元孫格模杭權自牧堂先生發至

靜軒先生權皆潔行績學詮經衛道世稱蔡氏九儒云

閩書

蔡氏九儒書

名儒傳

處士蔡牧堂先生發

蔡發字神與博達古今深究治道清修苦節世人賢之
承國錄君嚴訓有志當世而復秉執剛毅不能與世俗
相俯仰因去游四方見聞益廣邃於易象天文地理三
式之說無所不通而皆能訂其得失中年乃歸築室於
武夷之陽其間屢遭盜賊水火之變履危蹈險而浩然

不以屑意雖一介之微不取杜門掃軌專以讀書教子
為事晚號牧堂老人元定在娠時先生嘗以聖賢像設
別室使妻詹氏日夕瞻仰以踵太任胎教之風故元定
生而穎悟十歲即教使讀西銘稍長遂以程氏語錄邵
氏經世張氏正蒙授曰此孔孟正脉也文公朱先生謂
公平生所以教其子者不干利祿而開之以聖賢之學
其志識高遠非世人所及云所著有地理發微天文星

象諸書子元定

九儒書

閩書

運幹蔡復齋先生沆

蔡沆字復之西山次子承父春秋之屬未得要領一日
讀易悟曰易一卦一爻為義各異謂春秋以一例該衆
事可乎讀書至道心人心則嘆云春秋二百四十餘年
間諸侯大夫行事發於道心者無幾聖人於贈仲子納
郟鼎皆據大義以止私欲一書綱領在此矣作春秋五
論而自為之序初遵父命嗣表伯虞氏更名知方及父
謫春陵領鄉舉從母命歸宗以季子梓後虞氏嘗教學

者以敬為入德門戶義為一身主宰復為學者遷善改過之幾又講明復卦言當以不遠復為法以頻復為戒官至兩浙運幹學者稱復齋先生子楠攔書 九儒

處士蔡素軒先生格

蔡格字伯至節齋先生長子性質沖澹躬耕不仕與從弟覺軒久軒靜軒自相師友由始至終未嘗少懈時有以佛老之教惑亂衆聽者格與學者講明孟子盡心章以力詆之作至書以警之又著廣仁說以自勵其衛道

甚嚴年七十卒學者稱素軒先生

九儒書

文肅蔡久軒先生杭

蔡杭字仲節號久軒九峯先生次子紹定二年進士歷諸王宮大小學教授遷校書郎奏對論正心及內降斜封之弊又言權奸不可復用國本不可不早定理宗嘉納其言淳祐中任浙東提刑遇事立斷人不敢干以私名為國子司業兼資善堂翊贊續以試國子祭酒歷遷工部侍郎權吏部尚書除端明殿學士同知樞密院事

寶祐四年拜參知政事落職張磻具奏蔡杭精通經術忠直敢言同僚罕及請復其祠祿以勵清節逾年復端明殿學士予祠致仕卒謚文簡以犯祖諱更謚文肅嘗論劾參知政事劉之傑黨于史嵩不叶物議又論京尹余晦凌辱三學及奏權奸丁全不可用即不待報去在州郡所至祀先儒旌忠節舉遺逸表行義寶祐中奉勅建西山精舍後復奉勅建廬峰書院前後頒賜御書大字先生致政家居皆敬刻本山之石崖修明先聖先賢

及先世祀事平生孝友出於天性四時祭祀仍遵伯父
節齋遺制遇期功緦麻之喪必素衣以終月數及治喪
毋得用浮屠法子公亮大理司直

墓志

閩書

九儒

山長蔡靜軒先生權

蔡權字仲平九峯先生季子聰明英毅孝弟忠信儀刑
子孫肄業於家庭兄弟聯席自相師友以兄恩補承務
郎授廬山書院山長教授鄉閭講明義理一日拜龜山
先生祠士友請正席臯比因取龜山楊文靖公求仁齋

記與諸生講明極其詳密上下咸稱其得家學心傳焉
著參同契論以斥二氏衍三問說以自省戒平生講讀
之外視富貴利達若將浼之者天性高潔有祖父風獨
處靜室幽軒終日怡怡學者稱靜軒先生

九儒書

文節蔡西山先生元定學派

按西山先生之學得之晦菴文公相從講授閱四十
年真文忠公撰九峯墓表云聘君以師事文公而文
公顧曰季通吾老友也凡性與天道之妙他弟子不

得聞者必以語季通焉異篇奧傳微辭邃義多先令
討究而後親折衷之故嘗輯其問答之辭曰翁季錄
者蓋引以自匹也此端平二年真公所述後十四年
為淳祐九年公之孫杭作朱子語錄後序亦言先師
嘗有親自刪定晚歲與先大父西山講論之語及性
與天道之妙名曰翁季錄者久未得出以流行於世
豈斯文之顯晦固有時乎是此書在宋季已莫可尋
覓矣先文貞公曾言

國朝浙西某家購得是書秘藏多年後經播遷復散佚
豈斯文終不傳於世也耶然先生之遺書微義今尚
有考前哲謂大者如河圖洪範之說太極經世之旨
所以輔益於朱子者不少其高深要妙處後學亦未
能卒讀也文公嘗曰季通平生學問多謙讓皆寓於
某集中是則讀文公集者尤得尋玩其大略一二則
是書雖亡謂之存可也噫西山雲谷兩燈相望今去
五百載想象芳規者猶如瞻日月而摩星斗矣

文節蔡西山先生元定

蔡元定字季通生而穎異八歲能詩十歲日記千百言
牧堂示以二程邵張之書曰此孔孟正脈也先生深涵
其義辨析益精讀書西山絕頂忍饑啖齋乾道間見文
公朱子於崇安遂師事焉文公扣其學大驚曰此吾老
友也不當在弟子之列凡講論諸經奧義諸弟子所不
得聞者必以語先生四方來學者必俾先從先生討論
而後折衷之文公嘗論中庸已發未發之旨謂人自嬰

兒至老死雖語默動靜之不同然大體莫非已發先生
不以為然謂未發之時要涵養一節功夫引程子敬而
無失便是喜怒哀樂未發謂之中後二年文公再與辨
論始悟其說而卷反之由是益奇先生故先生每至必
留講數日往往通夕對牀不暇假寐諸從文公遊者歸
必過先生之家聽其言論不忍去去皆充然有所得淳
熙戊申太常卿尤袤祕書少監楊萬里薦於朝特召辭
以疾鄉人稱為聘君築室西山將老焉韓侂胄擅政設

學禁以空善類一時臺諫承風排擊先生知不免謂學
者劉礪曰化性去偽惡得無罪及沈繼祖劉三傑為言
官連疏譏詆文公并及先生遂坐謫道州州縣捕甚急
不辭家而行或曰姑緩之先生曰獲罪於天天可逃乎
文公與從遊者數百人餞別蕭寺中坐客有興嗟泣下
者文公微視先生不異平時因喟然曰朋友相愛之情
季通不挫之志可謂兩得之矣而先生亦賦詩云執手
笑相別無為兒女悲與其子沈行三千里脚為流血既

至諸州士子從遊者日衆有名士挾才簡傲非笑前修者亦心服謁拜執弟子禮人為語曰初不敬今納命愛先生者謂宜謝遣生徒先生曰彼以學來何忍拒之若有禍患豈閉戶所得免乎貽書訓子曰獨寢不愧衾獨行不愧影庶可傳之子孫勿以余得罪故而遂懈馬一日謂沈曰吾欲安靜還造化舊物可謝客閱三日卒時慶元四年也年六十四葬建陽縣崇泰里翠嵐之山先生卒文公哭之慟誄之曰精詣之識卓越之才不可屈

之志不可窮之辨不可復得而見矣天之生是人也果何為耶嘉定三年侂冑既誅贈迪功郎賜諡文節先生與文公遊最久精識博聞同輩皆不能及義理洞見大原尤長於天文地理樂律歷數兵陣之說凡古書奇辭奧義過目輒解文公嘗曰人讀易書難季通讀難書易又曰造化微妙惟深於理者能識之吾與季通言而不厭因自輯所與先生問答者號曰翁季錄蓋引以自匹也先生居家以孝弟忠信儀型子孫而教人以性與天

道為先自本而支自源而流聞者莫不興起嘗言文公
教人以訓詁文字為先下學上達固是常事然世衰道
微邪說交作學者未知本源未必不惑於異端之說也
故文公晚年接引後學亦無隱然者文公疏釋四書及
諸經通鑑綱目近思錄與先生多所參訂啓蒙一書則
屬先生起橐至論易推本河圖洛書邵氏皇極經世書
先天圖往往與先生往復而有發焉平生問學多寓於
文公集中所著書有大衍詳說律呂新書燕樂源辨皇

極經世太乙潛虛指要洪範八陣圖說陰符經解及詩
東雜說若干卷學者稱西山先生明嘉靖間從祀啟聖
公祠

國朝康熙四十五年從學臣沈涵之請

賜御書紫陽羽翼四大字匾於祠子三淵沈沈皆能紹

父之學

道南源委
名儒傳

名臣言行外錄

蔡氏九儒書

翁竹林先生易

翁易字粹翁建陽人通六經尤長春秋嘗與計偕從劉

燭遊因得登朱文公蔡西山之門遂不介心青紫講明
奧義往返辨難悉得旨歸晚歲授徒竹林精舍學者稱
竹林先生子甫字景山寶慶二年進士既仕後尤勵志
讀書薦知西安縣除直講太常博士累官太傅少卿出
知江西轉運使兼守豫章改知泉州未赴卒以忠悃著
聲所著有蜀漢書浩堂類彙讀書壁記

丘子陵先生室

丘宓字子陵按西山集言丘子陵才學優長相隨謫所

辛勤不懈其志餘俟考

再按建寧選舉志載丘宙甌寧人紹興十八年進士未知即此

否公

處士蔡節齋先生淵學派

劉氏燭撰蔡西山先生墓志曰先生居家以孝悌忠
信儀刑子孫而教人也以性與天道為先自本而支
自源而流聞者莫不興起常言文公教人以訓詁文
字為先下學上達固是常事然世衰道微邪說交作
學者未知本原未必不惑於異端之說也故文公晚

年接引後學亦無隱然者按節齋為西山先生長子稟學家庭授易學宗旨又深探無極太極之妙所著有易學訓解太極圖解等書其從事學問本原者蓋家學之標的也前儒嘗論文公近思錄首編太極道體諸篇名為近思而實遠思似非初學階梯竊嘗妄議宋世周程張諸儒所以繼絕學者在於闡發道體本原而太極一篇即論學之統體也子思子中庸首篇首發性道之旨萬世宗之近思之錄其亦祖述中庸

之意歟西山先生所謂文公接引後學之苦心意在斯乎再按公所著易說甚多其太極圖解一篇草廬吳氏嘗譏之先儒闡析微言非後學所敢輕議謹敘述其說與同志訂厥疑焉其云易有太極易變易也夫子所謂無體之易也太極至極也言變易無體而有至極之理也先儒皆以太極二字便為萬化之原而於易之一字但目為易書故太極圖特以無極而太極發明易有太極之旨其所謂無極而太極者蓋

亦言其無體之易而有至極之理也以其無樞紐根
柢之形實為天下之大樞紐大根柢也而太極本無
極者以其為天下之大樞紐大根柢而初非有樞紐
根柢之形也聖人謂之太極者所以指夫天地萬物
之理也周子謂之無極者所以著夫無聲無臭之妙
也是以無極之說實有得於太極之一言或以為周
子妄加者謬也按此條吳氏草廬嘗議蔡氏謂周子
於太極之上加無極正是解夫子易有太極之易字

而其解易字亦曰易變易也澄謂變易屬乎陰陽豈可以言無極蔡氏自知其說之病乃引易無體之說以救之而曰變易無體之中有至極之理也朱子以易為陰陽之變易有太極者言陰陽變易之中有至理以為主宰也蔡氏既以變易無體為理矣而又曰中有至極之理然則理中復有一理乎變易無體已是言理而又曰有至極之理可乎又曰流行乎乾坤中之易非易有太極之易也果有二等易乎又曰陰

陽動靜之間是流行中之太極與夫子所言太極降一等果有降一等之太極乎蔡氏所解卦爻象象多有發明朱子未到處澄纂言中亦取其說但易解後別有大傳易說一卷主於破其師太極在陰陽中之說於道之大本大原差了故有此兩般易兩般太極之謬談云云按節齋所著易解數種及太極通旨諸書今皆佚而存者少矣吳氏所論或易解中及太極通旨之論耳若就現今九儒書中所存太極圖解一

篇其解易有太極易字謂變易無體而有至極之理亦言其生生不已變動不居無動靜無方體而有至理焉耳朱子語類曾言易有太極是生兩儀即所謂易也但先倒說此一句故曰易有太極細玩朱子所論正涵程夫子動靜無端陰陽無始之意蔡氏解易有太極似與朱夫子之言不異但以易有太極欲合無極而太極之旨語意似乎不同蓋易有太極之易字指氣而言而無極二字言其無方所無紀極泛言

其無形狀而有此道理耳故朱子曰周子之言有無以有無為一也蔡氏原未說到是理至論流行乾坤中之易非易有太極之易此在蔡氏易書中之論有疵處朱門如陳北溪先生亦曾指摘易說大槩依本義而大義與本義不同多涉元妙此不具錄云再按朱子言無體者或自陰而陽或自陽而陰無確定底故云無體也此交易變易之義也至論其體則謂之易語類云與易無體句不同各自說一箇道理而已

其理則謂之道則是太極矣又朱子答吳晦叔曰夫易變易兼指一動一靜已發未發而言之也太極者性情之妙也乃一動一靜未發已發之理也故曰易有太極言即其動靜闔闢而皆有是理也若以易字專指已發為言是又以心為已發之說也此固未當程先生言之明矣此數句解易有太極極得其要領按此則節齋之論易有太極之旨似與朱子合欲以易有太極之義合於無極則誠如草廬先生所辨摘

者矣乾隆壬申二月書

處士蔡節齋先生淵

蔡淵字伯靜西山先生長子也清修苦節有父風與弟
沈躬耕不仕內學於父外師事晦菴文公西山嘗曰淵
宜紹吾易學沈宜演吾皇極數而春秋則以屬知方馬
西山春陵之謫仲默從侍先生奉母家居文公曰季通
素患難行乎患難伯靜艱貞近之道訃音聞先生哀毀
骨立一以文公家禮為準廬於墓側泣血三年與當世

絕丁母憂年及耳順哀毀踰禮文公高弟黃幹廖德明
張洽萬人傑輔廣陳孔碩既折年輩以從之游學徒包
揚陳文蔚潘柄楊復李燾林夔孫李閎祖李方子葉采
沈憫戴蒙劉彌劬皆執經抱疑以質其學真德秀陳宓
陳韡黃自然王埜莫不曲巷過門以問出處之實理亂
之由真公參大政欲以大學為對先生以為實之以事
則理有據而言之易入不然無益真公深敬服西山留
意宗法先生繹先志而修明之建祠堂立儀約規條整

然其謹於禮有如此者先生平生於易中庸太極說最所如意更定數四嘗謂周子無極而太極之說得於易有太極之一言易者變易無體即無極之義著太極圖解一篇發明此旨見門人翁酉所序及郡守王氏遂所撰墓志至先生之教知行不偏敬義兼備內主於敬而發之以直行之以恕言之有常而動之可則嘗曰屋漏不愧暗室不欺獨行不愧影獨寢不愧衾皆先世之訓服而行之雖妻孥之言未有不可告人者亦未有不可

告於天者暴慢鄙悖之人一見先生尊敬斂衽蓋素履
之懿有以動其秉彝好德之良心焉所著有易傳訓解
易象意言卦爻辭旨古易協韻大傳易說象數餘論太
極通旨化原聞辨中庸通旨大學思問論孟思問讀詩
思問體仁擬議性情機要等書學者稱為節齋先生端
平三年卒年八十一子四格柄植棟

九儒書

閩書

翁思齋先生泳

翁泳字永叔始祖部唐昭宗朝謫次從王潮入閩泳篤

志好學從蔡節齋游與熊竹谷蔡覺軒為同門友註釋
河洛運行講義學者稱思齋先生

闕書

侍講葉仲圭先生采

葉采字仲圭初從蔡節齋受易學又嘗從李果齋陳安
卿游安卿以其好高妙少循序屢折而痛砭之自是屏
斂鋒芒駸趨著實構漁隱精舍問學日進淳祐元年登
進士第授邵武尉歷景獻府教授遷祕書監論郡守貪
刻遷樞密檢討知邵武軍作郡乘築祠郡泮以祀朱子

復置田若干頃祀朱子於光澤以果齋配累官翰林侍
講乞歸所著近思錄嘗以進呈理宗稱善又著解集西

銘性理等書

闕書

道南源委

進士翁先生酉

翁酉別號思齋崇安人紹定五年進士

九儒書

詹先生樞

詹樞崇安人好學粹文不苟仕進邑令陳樵子重建武
夷精舍延樞與熊蒙正為士人講說後輩欣然從遊

此公

考
缺再

文正蔡九峰先生沈學派

按先生於尚書及洪範數稟學於家庭卒之書成垂世不媿父師之託蓋一門潛心大業推本於牧堂西山貽謀者遠矣余嘗向慕彼時師友林立講磨切究其扶翼正學淵源為可稽也西山真先生嘗言某之生也後不及拜聘君床下復得與先生昆季及公晦諸公游比年退處念一相從於廬峰幔亭間迄不可

得而坐中客如先生與公晦父皆不復存然後知一日之會為千載之訣其亦可悲也夫觀此想見當時英賢一時聚散皆為正學顯晦所關噫自文公之後勉齋黃氏節齋九峰蔡氏雲莊劉氏果齋李氏諸高弟維持者數十年其後獨西山與鶴山私淑之餘仔肩道脈朱蔡之學賴以不墜師友從遊啟迪之功其所繫豈小哉

文正蔡九峰先生沈

蔡沈字仲默西山先生季子也與伯兄淵次兄沆皆從
文公遊先生年僅三十即屏去舉子業一以聖賢為師
及西山坐謫春陵先生隨侍從行繭足走三千里至則
父子相對以禮義相怡悅西山卒護喪歸於道有遺金
義不可受者固却之曰吾寧隨所止而殯不以累吾親
也初西山以洪範之數久失其傳獨心得之未及論著
曰成吾書者沈也文公晚年訓傳諸經略備獨書未及
為整環視及門求可付者遂以囑先生先生既受父師

之託凜凜常若有負蓋沈潛反復數十年然後克就其
序書略曰二帝三王之治本於道二帝三王之道本於
心得其心則道與治可得而言矣後世人主有志於二
帝三王之治不可不求其道有志於二帝三王之道不
可不求其心求心之要舍是書何以哉晚卜居九峰雖
當世名卿物色訪求不屑就也平居仰觀俯察默坐終
日瞭然有見於天地之心萬物之情反求諸躬衆理具
備信前聖之言不予欺也西山嘗著律呂新書八陣圖

皆為文公所歎重然學者鮮窮其微間以叩先生無不
毫分縷解者真公文忠撰先生墓誌云某生也後不及
拜聘君牀下而喜觀其書嘉定中始見君后山未幾過
余于洪都之郡齋留止數月暇則相從質問得所未悟
後三年將之潭詣諸君以別戶庭幽潔竹樹茂美如適
君平子陵之居伯仲聯席衣冠偉然若圖繪中見古人
物會李公晦蔡元思繼至引觴命爵名論迭發雜以辨
爭竟日散去未知離別之可重也比年退念一相從廬

峰幔亭間迄不可得而坐中客如君與公晦皆無復存
然後知一日之會為千載之訣其亦可悲也夫君承家
學淵源河洛由祖槩孫後先一轍言學之有本者必推
馬紹定三年卒年六十四諡文正學者稱為九峰先生
子模抗權

九儒書

真文忠撰墓誌

侍郎黃元輔先生自然

黃自然字元輔甌寧人嘉定末教授郡學以理學誨諸
生齋宿問辨率至夜分及漕廣西猶捐俸餘助修禮殿

官至吏部侍郎

邵志

教授蔡覺軒先生學派

按宋季山長教席多為名賢栖託之處蓋當時遺逸傳經之儒視此職者為重其在朝廷之上者亦以此職慎擇其選而待之不輕余讀揆席范謝諸公文薦覺軒先生之奏牘可考焉其曰布衣蔡某承累世之心學有經濟之大才自考亭師友散亡之後如某者未見其比是淳祐間有學有守之儒也曰處以學職

必能倡率士類知所嚮方是欲責成於秉鐸者作養
人才之事也夫推許在大賢之列而量才為學校之
官當時選授教職由揆席薦舉其鄭重如此故一代
人才萃蔚由此道也延及元代儒宗文師此席尚磊
落相望溯學脈稽文獻者不禁慨然於諸賢

教授蔡覺軒先生模

蔡模字仲覺九峰先生長子操行高潔風度夷坦隱居
篤學一以聖賢為師王楚创建安書院請任席長淳祐

中太守王遂薦之於朝堅以疾辭後宰相謝方叔等薦
乞表異以勸後學詔補迪功郎添差本州教授令有司
錄所著書并訪以所欲言模疏言敬義為萬世帝王心
學大旨价人大師等六者為國家守邦要道及請頒白
鹿洞學規於天下嘗輯文公之書為續近思錄及易傳
集解河洛探賾大學衍論語孟集疏等書學者稱覺軒

先生

九儒書

教授熊古溪先生剛大

熊剛大建陽人嘉定七年進士少穎敏從蔡節齋黃勉齋遊問學精專操行篤至為建安教授所著有詩經註

解性理小學集解學者稱古溪先生

性理大全 閩書
蔡氏九儒書

按蔡氏九儒書載先生撰牧堂地理發微序自言初受業於覺軒先生之門蓋皆得蔡氏一家師承所自矣今總附之覺軒學派焉

侍講翁丹山先生合

翁合字叔備崇安人七歲能文辟童選登嘉禧二年進士歷官有聲賈似道謫建州合上言建實文公朱子闕

里三尺童子亦知向善聞似道名咸欲嘔吐况見其面乎乞投荒裔以禦魑魅似道坐責授高州團練副使循州安置景定中擢侍講號丹山所著有丹山集

建陽郡志

備考

蔡氏九賢著述書名紀略曰蔡氏九賢著述甚富惜今無全而文公敘述伊洛諸儒遺言季通之力為多真西山先生撰九峰墓誌云文公顧曰季通吾老友也凡性與天道之妙他弟子不得聞者必以語季通焉異篇奧

傳微辭遠旨多先令尋討而後親折衷之故嘗輯其問
答之辭曰翁季錄者蓋引以自匹也而翁易行實述又
云易學啟蒙一書季通研精覃思屢年而後就晦菴復
刪潤之始克成書他如近思錄之所討論伊洛淵源錄
之所類集通鑑綱目之所草定太極通書西銘之所講
辨季通靡不盡心故每稱其考訂精密又云季通平生
著述多謙讓寄寓於某書集中云 見九儒書

蔡氏書堂實跡曰南山草堂在崇安縣武夷二曲兜眉

峰下牧堂公創書堂三間為游息之所嘉定戊辰公孫淵沈兄弟復構書堂於舊址相與講學其中後文肅公杭因祖父之舊而堂構焉故曰咏歸堂

又顯慶堂在建陽永忠里麻沙鎮北象岩晴雪山下紹興間牧堂公創書堂三間教其子元定公讀書之所

又西山精舍在建陽崇泰里西山與雲谷對峙四面壁立山頂平曠有前湖後湖兩水歸內淳熙乙未元定公築室結廬建石門城圍與雲谷文公兩燈相望往來講


道理宗朝御書西山二大字頒賜文肅公杭刻於本山
之西南崖

又大明堂在建陽崇泰里雲谷廬峰之下慶元間九峰
公沈受文公之命作書集傳創書堂二棟五植寶祐三
年理宗御書廬峰二大字頒賜文肅公杭刻於本山之
岩

何氏喬遷潭陽文獻蔡氏卷引略曰蔡氏爐弋陽郡人
生唐宣宗大中中拜鳳翔節度使再授東昌刺史昭宗

朝謫次從王潮入閩為建陽長官同劉少府翱節度使
翁部同時入閩而長官後卜居麻沙鎮水北四世出九
賢者孫名梅實為西山先生之派祖梅四傳至伯禧宋
真宗朝以神童授春官伴讀賜詩伯禧之弟伯充為西
山先生曾祖伯充之子名諒字守信由太學授國諭伯
充之叔名琇生子襄字君謨隨父居興化之莆田伯充
之孫名發號牧堂子元定謚文節厥後朱文公自五夫
遷居考亭築書堂於雲谷而文節亦自麻沙卜居後山

築室西山所謂疑難堂懸兩燈相望因號西山



閩中理學淵源考卷二十五

欽定四庫全書

史部

閩中理學淵源考卷二十六至二十九

詳校官編修臣謝振定

刑部郎中臣許兆椿覆勘

總校官原任中允臣王燕緒

校對官中書臣田尹衡

謄錄監生臣沈恕

欽定四庫全書

閩中理學淵源考卷二十六

廣平府知府李清馥撰

文肅黃勉齋先生幹學派

慈溪黃氏震曰乾淳之盛晦菴南軒東萊稱三先生
獨晦菴得年最高講學最久為集大成晦菴既沒門
人如閩中則潘謙之楊志仁林正卿林子武李守約
李公晦江西則甘吉父黃去私張元德江東則李敬

子胡伯量蔡元思浙中則葉味道潘子善黃子洪皆
號高弟獨勉齋先生強毅自立足任負荷又勿軒熊
氏禾撰考亭書院記云公祠以文肅黃氏幹配舊典
也從以文節蔡氏元定文簡劉氏燾文忠真氏德秀
建安武夷例也我文公體用之學黃氏其庶幾乎餘
皆守公之道不二又貢氏師泰撰勉齋先生書院記
曰文公門人弟子聰明卓越固不為少然求其始終
不渝老而彌篤者先生一人而已先生因劉子澄一

拜文公於屏山之後既慨然以斯道自任又曰聖賢
墜緒非文公無以明文公遺書非先生無以成則斯
文吾道確乎其有所歸矣又先生嘗曰年來學者但
見古人有格物窮理之說便馳心於辨析講論之間
而不務持養省察之實所以辨析講論者又不原切
問近思之意天之所以與我與我之所以全乎天者
大本大原漫不加省而尋行數墨入耳出口以為即
此便是學問退而察其胸中之所存與夫應事接物

無一不相背馳聖人教人決不若是觀此則文公捐館後諸門徒師法漸訛不但微言既絕而大義亦乖勉齋數言實救當時流弊信乎朱門的傳也考朱子門徒在閩中者二百餘在吳越江右楚黔者亦二百餘惟勉齋黃氏之傳獨遠流及元代在閩如勿軒熊氏石堂陳氏明代虛齋蔡氏荆夫陳氏翠渠周氏皆能衍翼宗派崇守家法要皆謹紫陽勉齋北溪瓜山西山諸遺槩其在今日閩海派別宗風墜緒尤可尋

遡論者謂

國朝先文貞公之學淵源所漸實鄉國之接武云至金華四子則又勉齋先生一派單傳流及明代如章楓山

國朝如陸清獻公皆是餘風所及者馥曾過金華仰止先賢詩云鼓棹歸閩路揚帆過越年澄波來活水佳

氣起蒼煙文獻渡江後

謂朱呂張講學及金華四子

忠良靖難前

謂宋文憲諸公只疑學派在猶自隔山川乾隆辛未五月念

七日

文肅黃勉齋先生幹

黃幹字直卿閩縣人父瑀以篤行直道聞為饒州司戶
歷官侍御史所至有聲父歿先生往見清江劉清之清
之奇之曰時學非所以處子也今洛陽正傳則在朱仲
晦矣盍往學焉即以書為容見之先生歸白母即日行
時方大雪既至見文公晝夜勵學不設榻不解帶倦則
微坐一椅或至達曙文公語人曰直卿志堅思苦與之

處甚有益嘗詣東萊呂氏以所聞於文公者相質正及
廣漢張敬夫亡文公與直卿書曰吾道益孤朋友亦難
得十分可指擬者直卿明睿端莊造詣甚篤斯道有望
於直卿者不輕後遂以女妻之寧宗即位文公奏授先
生將仕郎而銓中授迪功郎監台州酒務丁母憂學者
聽講於墓廬文公作竹林精舍成遺以書有他時便可
代即講席之語及編禮書獨屬以喪祭二編稿成文公
見而喜曰所立規模次第縝密有條理他日取家鄉邦

國王朝禮倣此更定之病革以深衣及所著書授之手
書與訣曰吾道之托在此文公歿先生持心喪三年畢
調監嘉興府石門酒庫遷知臨川縣改調新淦縣差通
判安豐軍尋知漢陽軍即於郡治後立周程游朱四先
生祠別為屋以館四方之士以病乞祠主管武夷沖祐
觀未幾起知安慶府至則金人犯光山安慶去光山不
遠民情震恐先生為守禦計請城於朝不待報下即日
興工計田出役法均費省城既完後二年金人破黃州

沙窩諸關淮東西皆震獨安慶按堵如故時李珣往維揚視師與偕行幹言金欲以十六縣之衆四月攻浮光侵五關五關失守則蘄黃決不可保蘄黃不保則江南危尚書聞此亦已數日乃不聞有所施行何耶珣不能用厥後光黃蘄失果如其言遂立辭去請祠不已俄再命知安慶不就入廬山訪友人李燭陳宓盤旋玉淵三峽間俯仰文公舊跡講乾坤二卦於白鹿書院山南北之士皆來集未幾召赴行在所奏事除大理寺丞不拜

為御史李楠所劾遂罷歸初先生在臨川時金華何伯
芟為臨川邑丞令其子基師事焉先生告以必有真實
心地刻苦功夫而後可基受命又以其學傳同郡王柏
柏傳金履祥履祥傳許謙而道益著學者推原統緒以
為文公之世適實皆淵源於先生云先生剛介洪毅於
師傳盡心致知之學身體之無遺力當官不避難不憚
事撫摩凋瘵如護肢體鋤強暴投機制變與衆絕慮營
畫守邊備禦籌闡外事如宿將嘗試也比歸老終窶且

貧煙火時不繼，蔬食餉客危。坐講切徹，旦夜編禮著書。不輟堅壯之志，終老彌勵。雖暮齡宿疾未嘗倦怠也。當時出朱門，號高弟者至衆。獨先生強毅有力，足任負荷。歸而弟子益進，巴蜀江湖之士皆來質疑請益。如文公時，俄命知潮州，辭踰月，乞致仕，特授承議郎。歿後數年，以門人請，謚特贈朝奉郎，與一子下州文學謚文肅。學者稱勉齋先生。貢氏師泰曰：南渡後，文公集諸儒之大成於時，門人弟子聰明卓越，固為不少。然求其始終不

渝老而彌篤者先生一人而已蓋先生有意斯文以陸
沈下官不能大行其學固可深慨然聖賢墜緒非文公
無以明文公遺書非先生無以成則斯文吾道確乎其
有所歸矣先生歿其傳之著者在閩則宓齋陳氏信齋楊
氏在浙則北山何氏江以西則臨川黃氏江以東則雙
峰饒氏其久而益著者則西山真氏衍義諸書凡今經
緯進講成均典教皆出先生講論之餘云所著書說十
卷六經講義三十卷禮記集註十四卷論語通釋十卷

論語意原一卷及勉齋集行世兄東字仁卿見上文公

學派

閩書名儒傳 理學宗傳 貢氏勉齋書院記
宋史 理學正宗

侍郎黃子敬先生師雍

黃師雍字子敬閩清人少從黃勉齋學寶慶二年進士
為楚州官屬時李全反狀已露師雍密結忠義軍別部
都統時青圖之謀洩青被殺時雍不為動秩滿朝議賢
之師雍恥出史彌遠門不往見之調婺州教授學政一
以呂祖謙為法慕徐僑有清望欲謁之會僑有召命則

不往僑聞賢之至闕以其學最聞而李宗勉趙必愿趙汝談等亦先後交薦丞相喬行簡許以朝除矣師雍入見勸其歸老行簡不說遂出知龍溪行簡罷史嵩之繼相遷糧料科延至私室謂曰糧料科密邇相府所以處君師雍不顧故與博士劉應起相善應起論嵩之嵩之疑師雍左右之諷御史梅祀彈師雍差知邵武久之遷宗正簿拜監察御史論嵩之罷之理宗欲以師雍為侍御史丞相鄭清之沮之曰如此則臣不可留遷起居舍

人兼侍講即力乞去清之猶冀其少貶師雍曰吾欲為
全人終不屈數月卒被劾罷久之以直寶文閣奉祀起
為左史改江西轉運使遷禮部侍郎命下卒於江西官
舍師雍為人簡淡寡欲靖厚有守言若不出口而於邪
正之辨甚明視外物輕甚故博採公論當官而行愛護
名節無愧師友云

閩書

宋史

通志

提管鄭中實先生鼎新

鄭鼎新字中實仙遊人嘉定十六年進士知晉江縣建

問政堂輯論語繫於政者二十四章書之堂壁建縣學
文宣王廟闢一堂扁以尊道時真西山守泉殊敬重之
尋通判處州監右藏東庫遷國子書庫授都大提管卒
鼎新少受業黃勉齋之門問答甚詳而與楊信齋遊嘗
考究禮書成編名曰禮學舉要又撰禮樂從宜集居家
好義有家塾義莊西山真氏嘗為之記其卒也遺命治
喪一以儀禮從事

閩書

仙遊志

教授陳日昭先生如晦

子覺伯

陳如晦字日昭長樂人從黃勉齋遊嘗讀西山真氏夜
氣箴作曰須見得冬為四時之夜夜乃一日之冬便是
自家嚮晦入息處又見得造化發育之妙便是自家事
物周旋處於此敬義夾持動靜交養則兩得之矣遂次
其韻為生意箴西山得之亟加稱賞一時耆德鉅公樂
與為道誼交以趙汝騰薦充經筵不果授本州教授卒
所著有論語問答及講義文集子覺伯字宗尹咸淳七
年進士授泉州教授以古道迪士幼主航海次泉州港

覺伯率同列表起居尋命攝州倅扈從入廣拜福建提刑數月罷歸聞匡山師潰憤惋不食且卒命其子曰吾宋臣也題吾墓則係吾於宋

閩書

提舉李汝明先生鑑

李鑑字汝明寧德人嘉定元年進士官終廣東提舉初從黃勉齋楊信齋遊得聞敬義之旨歸與龔剡創六經講社推明師說誘掖後進居官平易近民尤曉兵事嘗督捕贛寇提兵親入梅州界擒陳羅二賊後梅寇猖獗

授以州符賊憚鑑威名遁去及莅廣西值西浙大饑鑑
運米千艘全活甚衆

閩書

葉先生真

葉真字未詳三山人經義考林氏耕尚書集解後序曰
耕暫攝鄉校學錄葉君真里之耆儒嘗從勉齋遊其先
世亦從拙齋學與東萊同時又出家藏寫本林李二先
生書解及詩說相示較之首尾並同云 按耕叟謂葉
君真里之耆儒嘗從勉齋遊其先世亦從拙齋學意其

人必卓然者且溯其家世學有淵源惜未得紀述可詳

姑錄其驟待考

經義考林氏耕
尚書集解後序

葉雲叟先生士龍

葉士龍號雲叟名與事實籍貫未詳待考 按劉後村

送葉士龍歸竹林精舍詩曰侍講開甥館三間不至奢

少曾居北面老只住東家野筍庖尤美深衣袞未華何

時尋舊路去謁玉川茶 按此詩後劉公小註云勉齋

依文公以居雲叟勉齋高弟云

閩中理學淵源考卷二十六

欽定四庫全書

閩中理學淵源考卷二十七

廣平府知府李清馥撰

文簡劉晦伯先生鑰學派

按真西山先生撰公神道碑略曰公平生大節雖未
易以一善名然溯其學問源流與夫見諸謀謨事業
則惟正之一言足以蔽之蓋公顯考銀青府君

即恒軒先

懋生蚤受學於屏山劉先生籍溪胡先生盡得義理精

微之蘊公幼在家庭耳濡目染朱文公以道德為學者師公出入其門切磨講貫者數十年眡他從游之士為最久又曰公天資厚重而不浮純一而不雜又嘗用力於致知力行之地每於夜間斂衽默坐虛心省察嘗曰不於定靜時體察則應事接物或至有差嘗取節孝徐先生帖教子弟其言曰日入之後至於夜中事物俱靜志氣俱定是君子思慮經綸之時晝之所行夜之所思也至其立朝大節在乞罷偽學之

禁以正人心息邪說又嘗言舍法兼取行藝今但考其藝而略其行請以朱某白鹿洞書院學規頒下兩學為諸生齋規與舊學規並行又取朱文公集註刊行胄監一時太學諸生稍務以道義相勉而知窮理居敬之說至講筵講論每援師說其奮忠陳謀察微慮遠於啟沃君心有獨至者今撮其大略著於篇

文簡劉晦伯先生鑰

劉鑰字晦伯懋子乾道八年進士歷官連城令蠲無名

征斂新學宮教諸生入德之方改知閩縣清簡為治與
民有信大族貴宦頑庶奸胥莫敢撓法諸臺府合詞列
薦先生自謂與趙丞相汝愚有連避嫌乞通判潭州以
歸寧宗受內禪先生寓書丞相曰前日之事如病寒熱
一旦解散即無所苦至於蠱毒中人初不自覺觸物而
發則殆矣蓋指韓侂胄而丞相不能用丁父艱學禁方
嚴從朱子於講學武夷築雲莊山房為終老計寧宗初
知德慶府興學校練軍實入對請恐懼修省開言路進

人才飭邊備執政議欲留先生宰臣陳自强曰斯人閩縣之政吾知之然真偽學也侂冑誅自强遂以先生提舉廣東常平茶鹽嘉定二年召對帝嘉獎除吏部郎中輪對請開張聖聽於經筵講讀大臣奏對反覆問難以采義理之當否政事之是非乞外除浙西提點刑獄所劾不避權要所舉不受干求召國子司業言治道原於士風士風本於學術藝祖干戈甫定召處士王昭素講易禁中累聖相承以為先務治教休明儒宗間出然

後六經遺旨孔孟微言復明於千載之後天下學者誦而習之以論語孟子大學中庸為準故其事父則孝事君則忠世之所謂道學也慶元以來權佞當國惡人議已指道為偽屏其人禁其書十餘年間學者無所依向義利不明趨向污下望其立名節修職業胡可得也乞降明詔罷偽學之禁息邪說正人心宗社之福又言舍法兼取行藝今但考其藝而略其行故侍講朱某白鹿洞揭示學規皆聖賢教人大旨謹錄以進請頒下兩學

與舊學規並行從之嘗言於丞相史彌遠請以朱子所著論語中庸大學孟子之說以備勸講後先生在成均遂以數書鉞於胄監俾學者誦習焉除權刑部侍郎兼祭酒左諭德同修撰時羣臣爭務容默先生疏請崇獎忠謹以作士氣深戒諛佞以肅百僚固藩籬選將帥尤今日不可緩者除刑部侍郎權工部尚書兼右庶子仍兼講讀於東宮每講論至經史所陳聲色嗜慾之戒輒懇切敷陳以年過七十乞休疏凡二十餘上許之積階

大中大夫以通奉大夫致仕遺表聞贈光祿大夫官其
後賜諡文簡先生為人簡質端重而天性孝友少習家
訓長得名師如張宣公呂成公皆前修鉅儒相與往復
講論其學以不欺為主其接物夷易與人言心平氣和
語簡而當聽者心服稱人之善無溢美其惡惡亦無深
疾每病學者空談無實嘗為天台學四先生學記曰學
者當窮理以致其知反躬以踐其實若趨其名以為高
入耳而出乎口皆四先生之罪人也其平生所素戒在

此每夜斂衽默坐虛心省察嘗取徐節孝帖教子弟其
言曰日入之後至於夜中事物俱靜志氣俱定是君子
思慮經綸之時晚號雲莊居士著有奏議史彙經筵故
事東宮詩解易經說禮記解講堂故事雲莊外彙續彙
若干卷子匣

道南源委

閩書

西山撰神道碑

司農詹元善先生體仁學派

按西山真先生敘公行狀詳矣但舊傳俱載西山從
遊於公而行狀並未敘及及讀祭文有云若某之不

才顧何足以語上而公獨以為可教每更以留連讀此似平昔曾親炙論說非同及門受業者不然行狀獨無一語敘及耶今仍採舊傳錄出以待考訂再按先生之父詹公慥與胡公宏劉公子暈游而先生又出紫陽之門其於當世名臣如梁公克家趙公汝愚周公必大皆與往復人才商論國是而蔡西山被謫時留在邑中甚得公調護之力真公稱其立朝當官自信所學於辭受出處之槩尤不苟云

司農詹元善先生體仁

詹體仁字元善建寧崇安人父慥與胡五峯劉屏山游先生登隆興元年進士第調饒州浮梁尉郡上先生獲盜功狀當賞謝不就為泉州晉江丞程尚書大昌司馬侍郎汲相繼為守賞待特異郡有疑獄必諮焉宰相梁克家泉人也始知先生薦於朝入為太學錄遷太學博士尋遷太常博士時高宗廟謚或謂宜稱堯宗先生言謚法雖有之於古無據且大行功莫盛於中興請比殷

武丁諡為高議遂決累官太常少卿時上以積疑成疾
久不過重華宮先生陞對首陳父子至恩引易睽孤之
說以開廣聖意孝宗崩先生率同列抗疏請駕詣重華
宮親臨祥祭時趙汝愚將定大策外庭無預謀者密令
先生及左司郎官徐誼達意少保吳玘請憲聖太后垂
簾為援立計寧宗登極天下晏然先生密贊汝愚之力
也時議大行皇帝諡先生言壽皇帝事德壽二十餘年
極天下之養諒陰三年不御常服漢唐以來未之有宜

謚曰孝卒用其言先生深於禮故前後定兩朝廟謚異
論莫能奪議者躋之孝宗將復土先生言永阜陵地勢
卑下非所以妥安神靈與宰相異議除太府卿尋直龍
圖閣知福州言者竟以前論山陵事罷之屏處者八年
退居雪川日以經史自娛人莫窺其際始復直龍圖閣
知靜江府移守鄂州除司農卿復總湖廣餉事時歲凶
艱食即以便宜發廩賑救而後以聞侂冑議開邊一時
爭談兵以規進用先生移書廟堂言兵不可輕動皇甫

斌自以將家子好言兵先生語僚屬謂斌必敗已而果然開禧二年卒年六十四先生天姿超邁志守卓然自擢第歸即從朱先生遊講質疑義其學以存誠慎獨為主患世儒論經多失本旨曰惟皇上帝降衷於下民若有恒性克綏厥猷惟后此即天命之謂性率性之謂道修道之謂教也人能知此則知觀書之要而無穿鑿之患矣博覽羣書自天文地理卜筮醫藥百氏雜說靡不通於渾儀漏刻俱自親製以測驗皆合趙渙造新厯以

獻先生為作序中書舍人黃裳一見嗟異因以定交為
文若不經意而明白暢遂悉根於理致神識恬暢喜論
說古今遇佳士良友窮日夜語不厭立朝當官自信所
學於辭受出處之際尤不苟周公必大當國先生嘗疏
薦三十餘人皆當世知名士後多所收擢郡人真公德
秀早從之遊嘗問居官莅民之法先生曰盡心平心而
已盡心則無愧平心則不偏世服其確論云所著象數

總義歷學啟蒙莊子解諸書

真西山撰行狀

閩書

吏部廖子晦先生德明學派

按考亭淵源錄載德明所問朱子所答皆論學的要
如論敬之該貫動靜變化氣質須是勉強講論文字
不可與自家身心都無干涉又言閒散不是真樂論
前輩諸賢多是略綽見得箇道理便休少有苦心理
會又論太極朱子答書曰來諭一一皆契鄙懷足見
精敏又文公嘗稱曰德明學有根據為政能舉先王
已墜之典以活中路無告之人固學道愛人之君子

所樂聞而願為者觀此可知先生造詣為師門所心許者矣

吏部廖子晦先生德明

廖德明字子晦南劍州人少學釋氏及得龜山楊氏書讀之大悟遂受業朱子登乾道中進士第知莆田縣民有奉淫祠者罪之沈像於江會有顯者欲取邑地廣其居先生堅持不可累官至潯州有聲諸司交薦之先生曰今老矣况以道徇人乎固辭不受遷廣東提點刑獄

彈劾不避權要歲當薦士朝貴多以書託之先生曰此
國家公器也悉不啓封還之有鄉人為主簿先生聞其
能薦之會先生行縣簿感其知己置酒延之悉假富人
觴豆甚盛先生怒曰一主簿乃若是侈耶必貪也於是
追還薦章其公嚴類此時盜陷桂陽迫韶韶人懼先生
燕笑自如遣將馳擊而親持小麾督戰大敗之乃分戍
守遠斥堠明審賞罰宣布威信韶晏然如平時徙知廣
州遷吏部左選郎官奉祠卒先生初為潯州教授為學

者講明聖賢心學之要手植三柏於學澗士愛敬之如
甘棠在南粵時立師悟堂刻朱子家禮及程氏諸書公
餘延僚屬及諸生親為講說遠近化之嘗語人以仕學
之要曰德明自始仕以至為郡惟用三代直道而行一
句而已所著有朱子語錄春秋會要槎溪集諸書

按朱子語錄姓氏廖子晦先生錄語在乾道九年
癸巳以後所聞時朱子年四十四此為早歲及門
者再按黃勉齋答李貫之書論語錄以所記年月
為序以為未安又稱記錄之人如子晦文漢卿文
之類絕少今閱現今所刊語錄姓氏以廖子晦輔
漢卿為首或本勉齋所答之語所更訂耳考亭淵

源錄

道南

源委

問書

提刑鄒先生應博

鄒應博泰寧人受學於廖公德明寶慶中監行在都進
奏院奏對引書危微精一以朱子之說進嘗知婺州蘇
州提點江南西路刑獄為真公德秀所薦

鄭先生師尹

鄭師尹字未詳按建安郡守王氏遂撰建安書院記言
前守王公埜以廖公德明之門人鄭師尹為賢而開館

迎之尤以蔡公元定之孫模為賢而移書致之會書院
成請蔡君典教事適公入覲鄭以故歸蔡亦憂去士不
能不缺望云 考蔡先生模已見蔡氏家學鄭先生師
尹未詳疑是延建人必當時表著者今附之廖公學派
待考

王氏遂撰建寧府書院記言淳祐三年夏前建安
守王堇陛辭理宗命之曰游胡朱真流風未泯表
宅里以善其民則予汝懌堇再拜稽首奉命至郡
以游胡舊嘗有祠乃創建安書院祠朱子而又以
真西山配享請於朝許之按是時理宗淳祐元年
方辛學從祀周程張朱五子并求訪遺書而於郡

守到官之日訓辭復及之故所在興起書院獨多
蓋自端平初召用正人時稱小元祐自是數年崇
獎正學一時師席類多名儒者彥為紫陽文公派
澤故鄭氏師尹蔡氏模自皆一時之選也再按王
氏堃王氏遂亦皆宗仰朱子之學王堃為金華人
王遂為金壇人王堃曾友教於蔡節齋父子王遂
號潛軒曾撰節齋墓志序述學派源流闡
發特詳二公官學皆卓然者也附此備考

提刑楊澹軒先生方學派

按長汀斯時惟澹軒先生及紫陽之門外此寥寥亦
風氣初開之始也傳稱其清修篤孝行已拔俗到官
操履剛正廉介不可干以私至論學之詳朱子集中

往復諸書可檢也

提刑楊澹軒先生方

楊方字子直長沙人清修篤孝行已拔俗隆興元年登
進士調弋陽尉還特取道崇安叅謁朱子面受所傳未
赴改清遠簿廣廉憲姚孝資檄攝曲江以廉介剛直聞
改武寧丞秩滿趙公汝愚帥蜀辟管機宜尋薦於朝召
對擢宗正寺簿乞外通判吉州淳熙末知建昌軍召為
樞密院編修官首疏乞朝重華宮辭甚懇切寧宗立除

秘書郎出知吉州偽學禁興坐汝愚朱子黨罷居贛州
閉戶讀書學禁稍弛起知攝州至官未數月乞祠以歸
嘉定更化名為右侍郎官進考功郎官操履剛正終與
時忤尋復去國越二年以鯁介老成除直寶謨閣提刑
廣西循歷屬部發摘奸貪官吏重足而立至桂嶺卒所
居植淡竹自號淡軒老叟學者稱為澹軒先生所著有
寒泉語錄

按朱子語錄姓氏楊澹軒先生錄語在乾道六年
庚寅所聞時朱子年四十一此為早歲及門記語

錄之最
早者

縣令丘啓潛先生鱗

丘方附

丘鱗字啓潛連城人少師事楊澹軒方嘉定十三年特
奏名調贛縣尉有廉聲歸值紹定寇發檄攝連城令畫
計禦寇率民登東田石全活甚衆招捕使陳鞞奏其功
辟知建寧縣姪丘方字正叔寶慶二年進士任寧都縣
丞興學課士有政聲同受業於澹軒先生

閩書

黎氏

撰邱先生書院記 汀郡選舉志

備考

黎氏士宏撰丘氏二先生書院記略曰連城踞萬山中
重巒疊峙覽竒者目不暇給矧東田數片石屹立一方
石之麓為宋儒丘二先生讀書舍後人即其遺址祠以
祀之按郡縣志丘鱗字啟潛嘉定十三年進士姪丘方
字正叔寶慶二年進士同受業楊澹軒先生澹軒先生
為朱門高弟其時同學諸子罕出其右及學成歸鄞江
考道問德與朱子往復辨論折衷至當載在語錄者章

章可考二先生從之學盡得其傳至啓潛先生禦寇有功辟知邵武軍建寧縣丞直郎日與劉德言梁文叔馮作肅吳大年葉直翁吳仲玉諸先儒切磋友善講道不倦邈其所從皆朱門嫡傳也又曰吾獨慨聞自龜山道南後羣英萃興號為鄒魯名邦汀距咫尺間何從學者寥寥唯楊先生謁朱子受所傳於前二先生從楊學紹所聞於後倡明聖道引誘善類汀人始知詩書禮樂之學是先生德業未顯於當時教化尚留於後世自是

士子爭自濯磨敦倫紀勵名節稱先則古代有聞人孰
非二先生教澤之所遺耶

林存齋先生憲卿學派

黃氏日抄言晦菴先生沒後公亦在高弟之列勉齋
祭先生文稱栗山之陽無百室之聚家絃誦而人縫
掖又皆知義理之訓公之教也又曰吾鄉之士遊晦
菴之門晚歲能自守者不過三數人如公之醇厚質
直樂善不倦則又朋友之所敬愛云

林存齋先生憲卿

林憲卿字公度福州懷安人居大山長谷之中與世異趨不妄交遊慎擇師友醇厚質直樂善不倦從晦菴先生遊知所自守以忠信見稱於師門以義理化導乎鄉里年七十猶嗜學不衰學者稱為存齋先生及卒黃勉齋誌其墓其徒吳宗萬林士蒙皆知名

考亭淵源錄
閩書

潘瓜山先生柄學派

朱子答謙之書曰所示問目如伊川亦有時教人靜

坐然孔孟以上却無此說要須從上推尋見得靜坐與觀理兩不相妨乃為的當耳按謙之在朱門為高弟其所問心性分別與夫靜坐及存養數條俱為涵養本原切已功夫慈溪黃氏嘗言晦菴沒後閩中門人如潘謙之楊志仁林正卿林子武李守約李公晦皆在高弟之列以此知其選矣又按公之父滋從林先生之奇遊聞晦菴講道武夷遂命公兄弟從遊皆以弱冠樞衣有道厲志前修蓋貽謀有自來矣

潘瓜山先生柄

潘柄字謙之懷安人父滋林公之奇高弟也黃勉齋嘗受業焉兄植字立之工於文不赴場屋勵志潛修專以務實為本兄弟承父命俱往事文公於武夷公稱曰立之有說得到處先生年十六即有志於道文公悉以所學授之遂取聖賢格言為訓又以呂氏鄉約櫛括繼其後凡存心養性之道律已治人之功條目具列終身所行不出於此著易解尚書解學者稱瓜山先生

按朱子語錄姓氏潘瓜山先生錄語在淳熙十年
癸卯以後所聞時朱子年已五十四此為中歲及
門者閩書考亭湖
源錄道南源委

蘇先生國台

蘇國台其先德化人曾祖欽遷於仙遊父權從祖總龜
皆為名儒國台從瓜山潘公學

楊信齋先生復學派

考公平昔多講貫於制度典章之學文公沒後又從
勉齋黃氏游稱朱門高弟西山真氏莅官至閩於三

山築尊德堂以待之是時公年已老所造有更超然者矣

楊信齋先生復

楊復字志仁福州長溪人朱子門人後又受業於黃勉齋勁特通敏考索最精見者無不嘆服陳師復稱其學問精深服膺拳拳真西山知福州即郡學創貴德堂以處之著祭禮圖十四卷儀禮圖解十七卷又有家禮雜

說附註二卷學者稱信齋先生

道南源委 考亭淵源 錄 閩書

林先生桂發

林桂發福寧人父艾隱先生志晦菴之學子三宗旦如坦皆有文名桂發受業晦菴之門人信齋楊公復以繼先志云東發黃氏震撰公父墓誌略曰寶祐乙卯歲余應鄉書聞有高才卓識持衡風簾間者是為林公桂發而未果識也余既竊第歸君來從事府幕一見如平生歡而未由款誨益也後四三年再會君吳門與語夜參半君袞袞談古今析義理如傾河漢不可休知其學必

有自來而未能悉也自是每見閩之士必問君家世皆
言君父隱先生之子父隱古學古心超然不與世接君
亦刻厲先志坐是偃蹇於世余於是益敬之後之又十
年余歸自江西君適從事沿海制司之幕秩滿赴班因
得請問父隱先生詳委君乃愀然言曰宦遊日久先君
墓猶未銘正欲屬之子余謝不能再三明日以其狀來
又辭至再三皆不獲乃敬為敘其事而次之

朝奉李公晦先生方子學派

文公嘗言公晦資稟自是寡過然開濶中又須鎮密
寬緩中又須謹嚴先生曾與真文忠公為僚於泉山
文忠公言公晦學邃而氣平本經術明世用事之大
者余必咨而後行其撰清源文集序言公晦仕泉時
為郡守程公所囑輯清源文集七百餘篇集成而某
至又為先生子祝辭贊先生為朱門高弟觀此知先
生其有體有用之學者歟又虞邵菴撰雲巖書院記
其言曰先生祖子孫三世受學朱子之門當是時閩

之學者比於鄒魯余得先生所為年譜序知其於朱氏之學確守而不變所謂豪分縷析致知力行蓋終身焉雲巖即先生講學故處也今錄其梗概著於編

朝奉李公晦先生方子

李方子字公晦呂之孫少博學能文為人端謹純篤初見朱子謂曰觀公為人自是寡過但寬大中要規矩和緩中要果決遂以果名齋長遊太學學官李道傳折官位輩行具刺就謁嘉定七年登進士廷對第三人調泉

州觀察推官真西山為守稱其學邃氣平本經術明世
用每有大事必咨決而行暇則辨論經訓至夜分不倦
故事秩滿必先通書廟堂乃除先生曰是求也可乎哉
丞相史彌遠怒之踰年始除國子錄將選入官僚不少
貶以希合或告彌遠曰此真德秀黨也使臺臣劾罷之
既歸從遊者盈門竟日危坐未始傾側對賓客一語不
妄發雖奴隸亦不加詬詈然皆嚴憚之其學得諸心傳
親切超詣嘗語人曰吾問學未能周盡幸於大本有見

此心常覺泰然不為物欲所漬若得真實務學之人發
明綱領斯道庶幾不墜爾起辰州通判尋卒著有朱子
行狀傳道精語等書又有禹貢解朱子嘗稱許之寶慶
二年真公德秀官樞密與尚書袁甫進於朝特旨授朝
奉郎致仕與一子恩澤弟文子

按朱子語錄姓氏李公晦先生錄語在淳熙十五年戊申以後所聞時朱子年已五十九此為晚歲及門者閩書道南源委歷代名儒傳

蔡白石先生學派

泉南人文之盛自紫陽文公倡興同安繼以白石蔡先生北溪陳先生宗主文公家法而士習翕然嚮風由是瀛洛關閩之書家絃戶誦號為紫陽別宗其時王梅溪真西山諸賢後先莅官至止主盟斯道人文愈著五百年來知朱真諸大儒之澤矣而白石北溪輔翼踵起之功未有表章者三山蔣氏閩學源流有議公及黃氏巖孫張氏巽郡中宜建以特祠者後之君子折衷詳考必有取焉乾隆十三年戊辰七月初

六日書

蔡白石先生和

蔡先生和字廷傑晉江人願從朱文公遊以親老不能
去勉友人陳易往受業數以書從易請質無虛日居白
石村喪祭酌古禮鄉閭化之真西山守郡李果齋以文
公弟子佐幕議創書院於東湖延和為堂長會易鎮不
果同時有北溪陳淳往來道泉學者勉強講授一時如
同邑蘇思恭王次傳王雋黃必昌安溪鄭思忱思永惠

安江與權永春卓琮黃以翼皆從先生與淳學先是郡士專經者泥章句業文者競浮華析理者駕玄虛自文公導其源白石北溪濬其流條理明備講論平實由是關洛考亭之書家誦人習理學之盛號為紫陽別宗居白石村學者稱為白石先生著有易說

監院鄭景千先生思忱

鄭思忱字景千安溪人授尚書於西溪李季辨解析精詣生徒常百數嘉定三年以詞賦領鄉薦第一中第為

新興令除遺利錢三百萬再知崇安縣以譖左遷浦城
丞謁真文忠公與語知其賢言於太守得復任知南恩
州歷浙東參議雷變上封事言士溺苞苴習久難化民
坐困且盜宜去貪恤人節用蓄力除監登聞鼓院卒年
七十二公少年豪爽晚而和粹凝然有守君子也著有
詩書釋按先生與景修先生思永皆從蔡公和與陳公
淳學時稱紫陽別宗清溪傳入朱門派繫自二先生始

鄭景修先生思永

鄭思永字景修安溪人好學篤行蔡白石愛其樸粹妻以女從學終身著有易說

閩書

王崑父先生次傳

王次傳字崑父晉江人善講析指授生徒多貴顯再預薦不第

閩中理學淵源考卷二十七